

A de letschte Fasnacht jo do hani mech bös blamiert
do han ich doch euse Gmeschti Chor scho zom Tod protokolliert
ich entschuldige mech drom e aller Form das er no senged esch wunderbar
ond es tönt ersch no besser als be dene em MusicStar

En Swiss Pilot stoht met sim Flüger z`Klote a de Startplanke
do rüeft en Arbeiter hey flüeg noni ab mer müend den zersch no tanke
nei ich bruch e kei Sprit seit de Pilot ich flüg höt ohni Motor dors Gländ
well hend ene hocked alls Zörcher wo kei Floglärm wänd

Ofs Neujohr het d`Post weder ufgschlage be de A ond B Post Sache
doch die chönnd mech jo dodemet ned wörkli verrockt mache
well wenn ich jetz för en B Post Brief 15 Rappe muess meh uftriebe
denn duenni eifach för 15 Rappe au meh en Brief ieschriebe

D`Svp die seit ganz klar de Chrestoph oder keine
d`Cvp seit mer phalte beid Setz ond gänd de Fdp nomme eine
d`Fdp die seit met em Blocher d`Sp ond die Grüene säged ohne
jo so het vor de Bondesrotswahl jede so sini Visione

Also das met eusne Schiefahrer das wot mer ned en Grend
das die met erne alte Azög weder schneller send
jo wenn das stemmt den legg ich jetz wenn es schnell muess ga
bem Gschlächtsverkehr öber mis Beschte Stöck au en alte Azog a

Ob liseschrott oder Holzchlötz oder Eisibetonhalle
jo ergendwie do müend die z`Brogg eifach emmer uffalle
ond jetze wot doch scho weder ein met sine Sommervögel aastenke
doch was send scho demm sini paar Vögel gäge eusi Bärgfenke

Chum esch euses Jubiläumsjohr verbie er wärdeds ned ahne
do duet doch eusi Schuelpfleg scho s`800 jährige plane
well demol de het Präsidäntin gseit sige si lieber z`früh als z`spot
damet e 50 Johr de Henderscht ond Letschti au weiss wo de Omzog dore goht

Bem Strossebou sinerzyt het euse Gmeirot falsch programmiert
sosch hätter statt de Oberdorfstross zersch Dorfsteig saniert
den hätte mer det die Bsetzistei wos nömm brucht das chaschter dänke
occasion no zom halbe Pries de Brogger Altstadt chönne schänke

Es paar nätti Wort so vo Dorf zo Dorf ond scho esches passiert
d`Gmeinde Stelli ond Vellige die händ zäme fussioniert
ond jetz hani ghört das die z`Röfenach met eus fusionire wänd
well mer schiends do en Rinike die besser Busverbendig händ

43 Johr chrampfe för d` Ferma Treyer Chappeau Amsler Franz
no so röschting ond scho pangioniert ergend öppis stemmt do ned so ganz
jo allso wens`der de Heime langwillig esch du de gang doch of Gmei go frage
öb`s no ein bruched wo pecklet ond schuflet bem nächschte Wasserleitigsschade

Mer händ e eusem Dorf Persone die send eifach genial
do gönnt doch en Riniker Zauberer z`Arosa s`Humorfestival
wo de Präsi vo de Akut das ghört esch er grad zuenem grönnt
ond hetten gfrogd öb er ned eusi Starchstromleitig en Bode ie zaubere chönnt

A de letschte Gmei überchonnt s`erschte mol z`Rinike ein en Orde
för sini grosse Verdienst esch de Dr.Martin Vögtli Ehrebörger worde
jetz benni aber wörkli gspannt welle Pris ich en Empfang neh cha
wenni s`nächste Johr als Komedi mis 20 Jährige ha

Der Komedi⁰⁴

Wänd er me bsueche? Ich be dehei onder „www.komedi.ch“

Walliser Wälschi ond Oestricher jo du allesamt
jo die düend sech striete wohär de Raclette Chäs äch stammt
jo ich froge jetz ganz blöd jo ich be so frey
chonnt denne de Raclette Chäs ned vo de Chäserey

Peoples in Wallise in Waelsch auch ond von Austria
streit haben voun Raclettcheese kommt you wohier ja
ich jetz gefragt ein wenig bled ich understand not nei
Cheese nicht jetz immer gekommen von die Cheeserei
Also wenn er das ned verstande händ denn duen ich euch d'Lösig bringe
so tönt de Värs vo vori wennen die neui Miss Schweiz wörd senge